

## Nor mett FKK wars auszehalle

Gestern hott uns de Schorsch besucht unn hott sich vom Urlaub zurick gemeld. Moi Fraa iss gleich in de Keller unn hott Ebbelwoi gehollt, de Schorsch hott enn große Schluck genumme unn hott dann e bisje vom bayrische Wald verzehlt. Dasses dort aach gonz schee heiß war, unn dass er unns Kättche desdeweche nor dreimol mettem Audo in de Geeschend erum gefahrn sinn. Doodeferr warnse fast jeden Daach im Schwimmbad, dess hätten sehr gut gedue, unn owends hätte se dann enn mords Hunger gehabt, Esse unn Drinke wärn doo unne joo aach noch nit so deier.

Dann hott de Schorsch mich gefroocht: Was habden ihr so bei dere Hitz in de letzte Woche gemacht, habbder se gut iwwerstone?

No ja, habb ich gesacht, vill hosde joo nit mache kenne. Daach-siwwer bisde in doine vier Wänd gebliwwe, owends spät hott merr ab unn zu mol enn kloone Spaziergong gemacht, unn om Somsdaach owend warn merr emol in Wicker, awwer merr konn joo nit vill drinke, nor Wasser, unn dess schmeckt merr langsam nimmi.

Jesses ihr Leit, hott uff oomol de Schorsch gerufe, ich habb vorhin de Karl getroffe unn der hott merr was verzehlt, also dess missder heern.

No, habb ich gemoont, was iss dann mettem Karl?

Also, de Schorsch hott merrs Ebbelwoiglas hiegehalle unn ich habbem noch emol oigeschenkt, de Karl hott merr verzehlt, dasserr mett soim Enkel Alexander, der schunn achtzeh iss, aach iwwer die Hitz geschwetzt hott. Weil der Bub war mettem Fluchzeuch in de Türkei unn doo hotten de Karl gefroocht, wies war unn obs dort aach so heiß gewese wär.

De Alexander wär gonz begeistert gewese: Opa, es war es ein toller Urlaub, wir waren eine super Clique, so zwanzig Jungs und Mädels. Und eine Hitze! - wir hatten jeden Tag mehr als vierzig Grad im Schatten, und nur mit FKK war's auszuhalten.

So so, hätt de Karl mettem Kopp gewackelt, FKK – doo seid ihr also de gonze Daach nackisch om Strond erum geloffe?

Nein, hätt de Alexander gesacht, Opa, das kannst du in der Türkei nicht machen. Nein, FKK, das ist für junge Leute in meinem Alter eine Abkürzung von Tätigkeitswörtern. Also F, das heißt ...

Nix, de Karl hätt sich sofort die Ohrn zugehalla, dess will ich garnit wisse, du bist doch erst achtzeh unn machst schunn Sache, die mit F oofonge, was sachten doi Mutter dezu?

Opa!!, de Alexander hätt de Karl richdich streng oogeguckt, Opa!! - FKK heißt Flirten, Küssen, Knutschen – was hast du denn gedacht?

De Karl muss e zimlich bleed Gesicht gemacht hawwe: No ja, wenn joo sunst nix bassiert iss ... Ich habb die Hitz joo aach nor mett FKK ausgehalle.

Jetzt hätt de Alexander e bisje komisch geguckt: Opa, bist du auch im Garten so ganz ohne ...?

Doo hätt de Karl gelacht unn hätt soi Bierflasch geschwenkt: Alexander, FKK, dess iss ferr enn Monn in moim Alter e Abkürzung ferr Untätigkeitsworte unn die haaße: Fernseh, Kautsch unn Keller!

Eiern Honnes